

**Sumáriu Kazu
Tribunál Distritál Suai
Outubru 2021**

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru feto no ema vulneravel. JSMP afirma la iha justifikasaun ba kualkér violénsia hasoru feto.

A. Sumáriu prosesu julgamentu kazu iha Tribunál Distritál Suai**1. Totál kazu ne'ebé JSMP monitoriza : 24**

Artigu	Tipu Kazu	Númeru
Artigu 145 Kodigu Penál KP, no artigu 2, 3 (a), 35 (b) no 36 Lei Kontra Violénsia Doméstika (LKVD)	Ofensa ba integridade fizika simples ho natureza violénsia doméstika (artigu 2 kona-ba conseitu violénsia doméstika, artigu 3 kona-ba relasaun familia, artigu 35 kona-ba tipu krime violénsia doméstika no artigu 36 kona-ba krime sira violénsia doméstika nian hanesan krime publiku)	5
Artigu 171 KP no Artigu 23,24	Tentativa koasaun seksuál	1
Artigu 138 KP	Omisídiu simples	1
Artigu 172 KP no artigu 2,3 (c), 35 (b) no 36 LKVD	Violasaun seksuál ho natureza violénsia doméstika	1
Artigu 154 KP & Artigu 2,3 (a), 35 (a) (LKVD)	Maus-tratus ba kónjuje ho natureza violénsia doméstika	1
Artigu 23, 24 no artigu 172 KP	Tentativa violasaun seksuál	1
Artigu 171 KP	Koasaun seksuál	1
Artigu 20 (1) (2 alinea f) Lei Arma Brankas	Arma brankas	1
Artigu 260 KP, Artigu 259 KP no artigu 258 KP	Danu ho violénsia, danu agravadu no danu simples	1

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275

Telefone: 3323883 | 77295795

www.jsmp.tl

info@jsmp.minihub.org

Facebook: www.facebook.com/timorleste.jsmp

Twitter: @JSMPtl

Artigu 1757, 1758, 1759, 1762, 1765, 1786, 1782, 1804, 1805 KS	Ezersísiu podér paternál	4
Artigu 259 KP	Danu agravadu	1
Artigu 272 KP	Reseptasaun agravada	1
Artigu 158 KP no artigu 181 KP	Koasaun seksuál no ezibionizmu seksuál	1
Artigu 295 KP, artigu 303 no 274	Pekulatu, falsifikasaun dokumentus ka notasaun teknika no administrasaun danoza	1
Artigu 138 KP, artigu 23,24 KP, artigu 2, 3 (c), 35 (b) no Lei Kontra Violénsia Doméstika LKVD artigu 20 (1) (2 alinea f) Lei arma brankas	Tentativa omisídiu simples ho natureza violénsia doméstika no arma brankas	1
Artigu 146 KP	Ofensa ba integridade fizika agravadu	1
Artigu 145 KP, artigu 2, 3 (c), 35 (b) Lei Kontra Violénsia Doméstika LKVD no artigu 20 (1) (2 alinea f) Lei arma brankas	Ofensa ba integridade fizika simples ho natureza violénsia doméstika no arma brankas	1
Totál		24

2. Totál desizaun ne'ebé JSMP monitoriza: 13

Tipu pena	Artigu	Númeru
Suspensaun ba prizaun nia ezekeusaun	Artigu 68 KP	7
Omologa dezisténsia keixa		4
Suspensaun ba prizaun nia ezekeusaun no absolve	Artigu 68 KP	1
Absolve		1
Totál		13

3. Total kazu sira ne'ebé adia tuir JSMP nia monitorizasaun: 0

4. Totál kazu sira ne'ebé sei kontinua prosesu tuir JSMP nia monitorizasaun : 11

B. Deskrisaun sumáriu ba desizaun kazu sira ne'ebé JSMP monitoriza

1. Kazu sivíl regulasaun ba ezersísiu podér paternal

Nú. Prosesu : 0026/18 CVTDS
Kompozisaun Tribunál : Singulár
Juis : Dr. Jose Maria Araújo
Prokuradór : Dr. José Elo
Defeza : Dr. Albano Maia
Desizaun : Omologa dezisténsia keixa

Iha 01 Outubru 2021, Tribunál Distritál Suai prezide julgamentu tentativa konsiliaun ba kazu regulasaun ba ezersísiu podér paternál, ne'ebé envolve autór BdFG (idade tinan hira) no MdFG hasoru rekeridu PG nu'dar autór nain rua nia aman, iha Munisípiu Covalima.

Termu no fundamentu sira

Iha data no fulan ne'ebé la apura, maibé iha tinan 2018, rekeridu sai husi uma hodi mai serbisu iha Dili, hodi sustenta menór sira, no rekeridu iha Dili serbisu hanesan motorista. Depoisde fulan ida serbisu iha, autor sira no sira nia avo la hetan ona informasaun ruma husi rekeridu, no rekeridu nia banin rona informasaun husi ninia kolega katak rekeridu hola ona feto seluk. Ho nune'e prokuradór reperezena menór nain rua hatama asaun ne'e kontra rekeridu hodi kontinua tau matan ba menór nain rua, tanba rekeridu hanesan motorista iha ekonomia suficiente atu tau matan ba menór nain rua, no rekeridu nia vensimentu kada fulan US\$115.00.

Kazu ne'e relasiona ho ezersísiu podér paternál tuir artigu 1757, 1758 (1), 1759, 1762, 1765, 1786, 1787(2), 1782, 1804 no 1805 KS, kona-ba responsabilidade inan-aman ba menór sira.

Tentativa konsiliaun

Iha julgamentu tentativa konsiliaun ne'e, rekeridu konkorda atu menór nain rua nafatin hela ho ninia avo no rekeridu sei fó alimentasaun ba menór nain rua US\$30.00 kada fulan no rekeridu sei entrega direktamente ba menór sira ninia avo mane. Alende ne'e, konkorda mós katak iha loron Sabadu no Dominggo rekeridu sei ba vizita menór nain rua, menór nain rua hela ho sira ninia avo, tanba sira ninia inan serbisu hela iha Australia.

Alegasaun finál

Prokuradór reprezenta menór no defeza husu ba tribunál atu omologa akordu ne'ebé rekeridu no rekerida konkorda hamutuk atu tau-matan ba menór.

Desizaun

Bazeia ba parte rua nia akordu kona-ba alimentasaun, hela fatin no rejime vizita nian, tribunál konklui prosesu ne'e no omologa akordu ne'e.

2. Kazu sivíl regulasaun ba ezersísiu podér paternál

Nú. Prosesu : 0051/21 CVTDS
Kompozisaun Tribunál : Singulár
Juis : Dr. Jose Maria Araújo
Prokuradór : Dr. José Elo
Defeza : Dr. Albano Maia
Desizaun : Omologa dezisténsia keixa

Iha 07 Outubru 2021, Tribunál Distritál Suai prezide julgamentu tentativa konsiliaun ba kazu regulasaun ezersísiu podér paternál, ne'ebé envolve autór NdJG (idade tinan hira) hasoru rekeridu FG rekerida SD (nu'udar autór nia ina aman), iha Munisípiu Covalima.

Termu no fundamentu sira

Iha data no fulan ne'ebé la apura, maibé iha tinan 2020, rekeridu ho rekerida namoru no moris hamutuk hanesan feen ho la'en durante semana ida. Depoisde semana ida sira rua moris separadu. Rekeridu ba fali hola feto seluk, maibé rekerida konsege isin rua no partus sira nia oan mane ida. Ho nune'e prokuradór representa menór hatama asaun ida ne'e hodi rekeridu tau matan ba menór ne'e. Rekeridu hanesan professor voluntariu ho salariu kada fulan US\$80.00, rekeridu iha ekonomia ne'ebé suficiente hodi tau matan ba menór ne'e.

Kazu ne'e relasiona ho ezersísiu podér paternál tuir artigu 1757, 1758 (1), 1759, 1762, 1765, 1786, 1787(2), 1782, 1804 no 1805 KS, kona-ba responsabilidade inan-aman ba menór sira.

Tentativa konsiliaun

Iha julgamentu tentativa konsiliaun ne'e, rekeridu no rekerida konkorda menór hela nafatin ho rekerida. Rekeridu sei fó alimentasaun ba menór US\$30.00 kada fulan liuhusi rekerida nia konta bankaria, tanba menór foin fulan sia, nune'e kada loron rekeridu bele ba vizita menór no banhira menór atinji ona tinan lima ba leten, rekeridu nia loron vizita mak loron Sabadu no rekeridu mós bele lori menór ba rekeridu ninia uma no entrega fali menór ba iha rekerida iha loron Domingo lokraik tuku 17:00.

Alegasaun finál

Prokuradór representa menór no defeza husu ba tribunál atu omologa akordu ne'ebé rekeridu no rekerida konkorda hamutuk atu tau-matan ba menór.

Desizaun

Bazeia ba parte rua nia akordu kona-ba alimentasaun, hela fatin no rejime vizita nian, tribunál konklui prosesu ne'e no omologa akordu ne'e.

3. Krime arma brankas

Nú. Prosesu : 0125/18. BBMLV
Kompozisaun Tribunál : Singulár

Juis : Dr. Naason M. A. M. Doutel, Dr. Benjamin Barros no Dr. Jose Maria Araújo
Prokuradór : Dr. Nelson J. S. Magno
Defeza : Dr. Manuel Amaral
Desizaun : Pena prizaun tinan rua suspende ba tinan tolu ba arguidu Jovanio Maldiri no absolve arguidu Danilo Gonçalves

Iha 07 Outubru 2021, Tribunál Distritál Suai liuhusi julgamentu movel iha Munisípiu Bobonaro, prezide julgamentu leitura akordaun ba krime armas brankas ne'ebé envolve arguidu Jovanio Maldiri no Danilo Gonçalves hasoru lezadu Sirenio Rafael, iha Munisípiu Bobonaro.

Akuzasaun prokuradór

Prokuradór akuza katak iha 23 Setembru 2019, iha oras tuku 19:00 kalan, arguidu Jovanio Maldiri lori tudik taa dala ida iha lezadu nia liman parte loos rezulta kanek kiik. Antes agresaun ne'e, arguidu nain rua hase'e lezadu nune'e "*hoe nusa maka taka fali bee ne'e*", no lezadu hatan katak "*desde meudia bee ne'e liga ba imi nia natar, tanba ne'e hau liga fali ba hau nia natar*", hafoin ne'e sira diskuti malu arguidu Jovanio Maldiri lori tudik taa dala ida iha lezadu nia liman parte loos rezulta kanek kiik, depoisde ida ne'e arguidu sira halai hotu.

Prokuradór akuza arguidu kontra artigu 20 (1) (2 alinea f) Lei Arma Brankas.

Produsaun ba prova sira

Iha prosesu julgamentu arguidu nain rua hili direitu nonok. Enkuantu lezadu Sirenio Rafael konfesa faktu hotu iha akuzasaun no deklarasaun mós katak arguidu Danilo Gonçalves la komete aktu ruma hasoru lezadu no kazu ne'e sira konsege rezolve ona no lezadu ho arguidu sira dame malu ona.

Alegasaun finál

Prokuradór haktuir katak mesmu arguidu sira hili direitu nonook, maibé lezadu konfesa nune'e prokuradór konsidera faktu hotu provadu, nune'e husu ba tribunál atu kondena arguidu nain rua ho pena prizaun fulan neen suspende ba tinan ida.

Entretantu defeza husu ba tribunál atu absolve arguidu Danilo Gonçalves, tanba bazeia ba deklarasaun lezadu nian arguidu la komete aktu ruma hasoru lezadu. Enkuantu ba arguidu Jovanio Maldiri defeza konkorda ho alegasaun prokuradór nian atu kondena arguidu ho pena prizaun fulan neen suspende ba tinan ida.

Desizaun

Depoisde avalia faktu hotu tribunál prova katak arguidu Jovanio Maldiri hasai tudik iha ninia pasta taa dala ida iha lezadu nia liman parte loos rezulta kanek kiik, enkuantu ba arguidu arguidu Danilo Gonçalves tribunál la prova katak arguidu komete krime hasoru lezadu.

Bazeia ba faktu provadu no la provadu sira ne'e, tetu mós sirkuntansia atenuante hanesan antes julgamentu arguidu no lezadu konsege rezolve ona problema ne'e no sira konsege dame malu ona. Ho nune'e tribunál konklui prosesu ne'e no kondena arguidu Jovanio Maldiri ho pena prizaun tinan rua suspende ba tinan tolu, enkuantu ba arguidu Danilo Gonçalves tribunál absolve.

4. Krime tentativa violasaun seksuál

Nú. Prosesu : 00161/19. BBMLV
Kompozisaun Tribunál : Koletivu
Juis : Dr. Naason M. A. Marques Doutel, Dr. Benjamin Barros no
Dr. Jose Maria Araújo
Prokuradór : Dr. Nelson J.M Magno
Defeza : Dr. Manuel Amaral
Desizaun : Pena prizaun tinan 3 suspende ba tinan 4

Iha 07 Outubru 2021, Tribunál Distritál Suai liuhusi julgamentu movel iha Munisípiu Bobonaro, prezide julgamentu leitura akordaun ba krime tentativa violasaun seksuál ne'ebé envolve arguidu DMM hasoru lezada FBB, iha Munisípiu Bobonaro.

Akuzasaun prokuradór

Prokuradór akuza katak iha 23 Setembru 2019, iha oras tuku 18:00 lokraik, lezada nia inan haruka lezada ba foti fos iha uma atu tein ba kalan. Lezada to'o iha uma loke odomatan tama ba uma laran foti fos iha uma laran no sai fali mai iha liur atu taka odamatan, derepente arguidu husi kotuk kaer lezada nia kabaas no liman sorin buti lezada nia kakorok no latan lezada ba rai no hanehan nia ain sorin ba lezada, tuir mai arguidu hatama nia liman ba iha lezada nia faru laran buti lezada nia nia hirus matan parte karuk no hatete ba lezada katak *"agora ita rua halo relasaun seksuál, se ita la halo relasaun seksuál hau oho kedas ó,"* dehan tiha arguidu kontinua atu kolu tan lezada nia kalsa, maibé la konsege kolu, tanba lezada tebe dala ida iha arguidu nia hirus matan no lezada hamrik hakilar halai ba testemuña DA iha dalan atu ba mota. Kazu ne'e aneksa mós ho relatóriu mediku husi PRADET.

Prokuradór akuza arguidu kontra artigu 23, 24 no artigu 171 KP kona-ba tentativa, tentativa nia punibilidade no violasaun seksuál ho moldura penál tinan 5 to'o tinan 15 prizaun.

Produsaun ba prova sira

Iha prosesu julgamentu, arguidu deklara katak akuzasaun prokuradór nian ne'e la loos hotu no deklara katak iha akontesimentu ne'e arguidu tein hela fahi nian, derepente lezada husi mota mai husu arguidu ninia tali chas telefone, maibé arguidu la fó no lezada husu tan arguidu nia telefone maibé arguidu nafatin la fó. Arguidu mós deklara katak hafoin ne'e lezada fila ba nia uma no bolu arguidu no dehan katak *"jadi ona"*, ho nune'e arguidu mós tesik ba lezada nia uma no kaer lezada nia liman no dehan katak saida mak jadi ona. Dehan tiha nune'e arguidu fila ba nia uma kontinua tein fahi nian.

Arguidu hatutan liután katak bainhira arguidu ba kaer lezada nia liman, lezada nia maun ne'ebé hanesan mós testemuña iha hela uma.

Enkuantu lezada kontinua konfirma faktu hotu iha akuzasaun no deklarata katak la kuñese arguidu hanesan vijiñu, lezada deklarata tan katak la iha relasaun família ho arguidu no lezada nunca empreta arguidu nia tali chas no telefone.

Testemuña DA nu'udar lezada nia maun depoimenta katak iha akontesimentu ne'e testemuña ba uma atu chas ninia telefone, to'o iha dalan klaran lezada halai hasoru testemuña ho tanis, tanba ne'e testemuña husu lezada "*nusa ó tanis*", no lezada hatan katak arguidu atu perkosa hau. Testemuña depoimenta liután tan katak depoisode akontesimentu ne'e iha dadeer testemuña ho lezada ba hato'o kedas keixa iha polisia no lori lezada ba halo ezaminasaun iha PRADET.

Alegasaun finál

Prokuradór haktuir katak iha julgamentu arguidu nega faktu hotu akuzasaun, maibé lezada konfirma faktu hotu iha akuzasaun, nune'e prokuradór konsidera faktu hotu provadu no husu ba tribunál atu kondena arguidu tuir artigu 171 KP.

Entretantu defeza, haktuir katak iha julgamentu arguidu deklarata katak faktu hotu laloos arguidu deklarata katak kaer de'it lezada nia liman, nune'e husu ba tribunál atu absolve arguidu husi krime ne'e.

Desizaun

Depois avalia faktu hotu, tribunál prova katak arguidu husi kotuk kaer lezada nia kabaas no liman sorin buti lezada nia kakorok no latan lezada ba rai no hanehan nia ain sorin ba lezada, tuir mai arguidu hatama nia liman ba iha lezada nia faru laran buti lezada nia nia hirus matan parte karuk no hatete ba lezada katak "*agora ita rua halo relasaun seksuál, se ita la halo relasaun seksuál hau oho kedas ó*."

Bazeia ba faktu provadu sira ne'e hotu, tribunál konklui prosesu ne'e no kondena arguidu ho pena prizaun tinan tolu suspende ba tinan haat.

5. Krime ofensa ba integridade fizika simples ho natureza violénsia doméstika

Nú. Prosesu	: 0230/20. BBMLV
Kompozisaun Tribunál	: Singulár
Juis	: Dr. Naason Mário Armindo Marques Doutel
Prokuradór	: Dr. Nelson J. S. Magno
Defeza	: Dr. Manuel Amaral
Desizaun	: Pena prizaun fulan 6 suspende ba tinan 1

Iha 07 Outubru 2021, Tribunál Distritál Suai liuhusi julgamentu movel iha Munisípiu Bobonaro, prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu MA hasoru nia feen ZdS no nia oan TMA (idade ...), iha Munisípiu Bobonaro.

Akuzasaun prokuradór

Prokuradór akuza katak iha 17 Dezembru 2020, iha oras tuku 17:30 lokraik, arguidu basa dala ida iha lezada ZdS nia hasan parte karuk, buti lezada ZDS ninia kakorok riba ba rai, arguidu kontinua tebe dala ida iha lezada ZDS nia kotuk, hafoin ne'e sira nia oan nain rua tanis no hatete ba arguidu nune'e "*apa to'o ona labele baku ona ama*", ho nune'e arguidu basa dala ida iha lezada TMA nia hasan parte loos. Antes agresaun hirak ne'e, arguidu ho lezada ZDS diskute malu kona-ba arguidu foti labarik sira iha lezada nia uma lezada hameno ba arguidu katak "*o lori labarik sira ba maibe sira tenke eskola*", nune'e mosu agresaun hirak ne'e no lezada konsege ba halo tratamentu iha PRADET.

Prokuradór akuza arguidu kontra artigu 145 KP kona-ba ofensa ba integridade física simples ho moldura penal to'o tinan 3 prizaun ka multa, konjuga ho artigu 2, 3 (a,c), 35 (b) no 36 LKVD.

Produsaun ba prova sira

Iha prosesu julgamentu arguidu hili direitu nonok. Entretantu lezada ZdS konfirma faktu sira hotu iha akuzasaun no deklar mós katak depoisde akontesimentu ne'e arguidu labaku ona lezada no lezada TMA mós kontinua konfirma faktu hotu iha akuzasaun no deklar mós katak depoisde akontesimentu ne'e arguidu la baku ona lezada.

Alegasaun finál

Prokuradór haktuir katak mezmu iha produsaun ba prova arguidu hili direitu nonook, maibe lezada nain rua konfirma faktu sira hotu iha akuzasaun, nune'e prokuradór konsidera arguidu provadu komete krime hasoru lezada sira no atu prevene krime hanesan akontese tan iha futuru, husu ba tribunál atu kondena arguidu ho pena prizaun fulan tolu suspende ba tinan ida.

Entretantu defeza husu ba tribunál atu kondena arguidu ho pena kmaan, mezmu arguidu hili direitu nonook, maibe lezada sira deklar katak depoisde akontesimentu ne'e arguidu la baku ona lezada sira.

Desizaun

Depoisde avalia faktu hotu, tribunál prova katak arguidu basa dala ida iha lezada ZdS nia hasan parte karuk, buti lezada ZDS ninia kakorok riba ba rai, arguidu kontinua tebe dala ida iha lezada ZDS nia kotuk, hafoin ne'e sira nia oan nain rua tanis no hatete ba arguidu nune'e "*apa to'o ona labele baku ona ama*", ho nune'e arguidu basa dala ida iha lezada TMA nia hasan parte loos.

Bazeia ba faktu provadu sira ne'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

6. Kazu sivíl regulasaun ba ezersísiu podér paternal

Nú. Prosesu	: 0038/18 CVTDS
Kompozisaun Tribunál	: Singulár
Juis	: Dr. Eusébio Xavier Víctor
Prokuradór	: Dr. Rafael Jeronimo Gusmão

Defeza : Dr. Albino de Jesus Pereira
Desizaun : Omologa dezisténsia keixa

Iha 13 Outubru 2021, Tribunál Distritál Suai prezide julgamentu tentativa konsiliaun ba kazu regulasaun ezersísiu podér paternál, ne'ebé envolve autór JMdA (idade tinan hira 3) no BJDá (idade tinan hira 5) hasoru rekeridu RdA, iha Munisípiu Ainaro.

Termu no fundamentu sira

Iha data no fulan ne'ebé la apura, maibé iha tinan 2014, rekeridu ba hola feto seluk, depoisde ida ne'e rekeridu nunca ba vijita sira nia oan no la fó alimentasaun ba menór sira. Ho nune'e prokuradór representa menór nain rua hatama asaun ida ne'e hodi rekeridu tau matan ba menór nain rua ninia nesesidade baziku loron-loron nian.

Kazu ne'e relaciona ho ezersísiu podér paternál tuir artigu 1757, 1758 (1), 1759, 1762, 1765, 1786, 1787(2), 1782, 1804 no 1805 KS, kona-ba responsabilidade inan-aman ba menór sira.

Tentativa konsiliaun

Iha julgamentu tentantiva konsiliaun ne'e, rekeridu no rekerida konkorda hamutuk menór nain rua hela hamutuk ho rekerida no rekeridu sei fó alimentasaun ba menór nain rua ho valor osan US\$40.00 kada fulan no rekeridu sei haruka tuir rekerida ninia konta bankaria. Alende ne'e, konkorda mós katak iha loron Segunda to'o loron Sesta Feira menór nain rua hela ho rekrida no iha loron Sabadu no loron Domingo rekeridu ba lori menór ba iha rekeridu ninia uma no iha Domingu lokraik sei entrega fali menór nain rua ba rekerida.

Alegasaun finál

Prokuradór representa menór no defeza husu ba tribunál atu omologa akordu ne'ebé rekeridu no rekerida konkorda hamutuk atu tau-matan ba menór.

Desizaun

Bazeia ba parte rua nia akordu kona-ba alimentasaun, hela fatin no rejime vizita nian, tribunál konklui prosesu ne'e no omologa akordu ne'e.

7. Kazu sivíl regulasaun ba ezersísiu podér paternál

Nú. Prosesu : 0158/17. CVTDS
Kompozisaun Tribunál : Singulár
Juis : Dr. Eusébio Xavier Victor
Prokuradór : Dr. Rafael Jeronimo Gusmão
Defeza : Dr. Angelmo Pinto
Desizaun : Omologa dezisténsia keixa

Iha 19 Outubru 2021, Tribunál Distritál Suai prezide julgamentu tentativa konsiliaun ba kazu regulasaun ezersísiu podér paternál ne'ebé envolve autór ZNM hasoru rekeridu AS no rekerida MdJ (nu'udar autór nia aman inan), iha Munisípiu Covalima.

Termu no fundamentu sira

Iha data no fulan ne'ebé la apuradu maibé iha tinan 2017, rekerida hola mane seluk no la tau matan menór, ho nune'e prokuradór representa menór ne'e hatama asaun ida ne'e kontra rekerida, rekerida ninia salari kada fulan US\$ 275.00, nune'e ekonomikamente suficiente atu tau matan ba menór ninia nesesidade loron-loron.

Kazu ne'e relasiona ho ezersísiu podér paternál tuir artigu 1757, 1758 (1), 1759, 1762, 1765, 1786, 1787(2), 1782, 1804 no 1805 KS, kona-ba responsabilidade inan-aman ba menór sira.

Tentativa konsiliaun

Iha julgamentu tentativa konsiliaun ne'e rekerida no rekeridu konkorda hamutuk menór hela ho rekeridu no rekerida sei fó alimentasaun ba menór ho valor osan kada fulan US\$100.00 liuhusi rekeridu ninia konta bankaria. Alende ne'e, konkorda mós katak rekerida livre atu vizita menór.

Alegasaun finál

Prokuradór reprezenta menór no defeza husu ba tribunál atu omologa akordu ne'ebé rekeridu no rekerida konkorda hamutuk atu tau-matan ba menór.

Desizaun

Bazeia ba parte rua nia akordu kona-ba alimentasaun, hela fatin no rejime vizita nian, tribunál konklui prosesu ne'e no omologa akordu ne'e.

8. Krime koasaun seksuál no ezibionizmu seksuál

Nú. Prosesu	: 0010/21 CVSUI
Kompozisaun Tribunál	: Singulár (singular ka)
Juis	: Dr. Naason Mário Armindo Marques Doutel
Prokuradór	: Dr. José Elo
Defeza	: Dr. Domingos dos Santos
Desizaun	: Pena prizaun fulan 6 suspende tinan 1 no selu kustu judisiál US\$50.00

Iha 21 Outubru 2021, Tribunál Distritál Suai prezide julgamentu leitura sentensa ba krime koasaun seksuál no ezibionizmu seksuál ne'ebé envolve arguidu AdO hasoru lezada FBLT (nu'udar viziñu), iha Munisípiu Covalima.

Akuzasaun prokuradór

Prokuradór akuza katak iha loron no fulan ne'ebé la apura maibé iha tinan 2020, iha oras tuku 17:00 lokraik, arguidu tama ba iha ninia haris fatin hodi bolu lezada “*suit suit*” no haruka lezada hateke ba arguidu, hafoin arguidu doko nia orgaun seksuál hodi hatudu ba lezada to'o ezakula, iha akontesimentu ne'e lezada fase hela bikan.

Tuir mai iha loron no fulan la apura maibé iha tinan 2020, iha tuku 17:00 lokraik, lezada fase bikan hela, derepente arguidu iha ninia uma kotuk bolu lezada ho maneira hanesan, hafoin ne'e arguidu hasai nia orgaun seksuál hodi doko no hatudu ba lezada.

Tuir mai iha 29 Janeiro 2021, iha oras tuku 17:00 lokraik, lezada fase bikan hela iha dapur, arguidu iha ninia uma kotuk kaer tali ida lao ba mai, arguidu nafatin ho maneira “*suit suit*” nune'e lezada hateke ba, depois arguidu doko nia orgaun seksuál hatudu ba lezada. Bainhira arguidu seidak doko nia orgaun seksuál, lezada tama ba uma laran no fó hatene ba ninia inan, hafoin ne'e lezada fila ba fase bikan no lezada nia inan tama sira nia haris fatin hodi hafuhu arguidu, depoisde ida ne'e arguidu haruka lezada muda tiha sanan hodi lezada haree arguidu doko nia orgaun seksuál to'o ezakula, depoisde ida ne'e lezada nia inan hakilar no halai sai husi haris fatin bolu arguidu ninia feen.

Tuir mai loron la apura maibé fulan Fevereiro 2021, iha oras tuku 17:00 lokraik lezada halimar hela iha has hun, arguidu bolu lezada ho maneira “*suit suit*”, bainhira lezada hateke ba arguidu arguidu halo sinal ba lezada atu loke nia saia hodi hatudu lezada nia orgaun seksuál ba arguidu, maibé lezada lakohi nune'e arguidu halo fali sinal liman tau iha kakorok no dehan ba lezada nune'e “*se ó lahasai ó nia saia no kalsina, ó lao mesak hau mak hetan ó, hau sei tesi kotu ó nia kakorok*” tanba tauk lezada tuur hodi hasai nia saia no hatudu ninia orgaun seksuál ba arguidu.

Prokuradór akuza arguidu kontra artigu 158 KP kona-ba koasaun seksuál ho moldura penál tinan 1 ka multa no artigu 181 KP kona-ba ezibionizmu seksuál ho moldura penál tinan 3 ka multa.

Produsaun ba prova sira

Iha prosesu julgamentu arguidu konfesa parsialmente ba faktu sira iha akuzasaun, arguidu deklara katak akontesimentu dala tolu ne'e loos, maibe akontesimentu ba dala haat ne'e laloos, tanba nunka dehan ba lezada atu hatudu ninia orgaun seksuál ba arguidu. Arguidu deklara liután katak foin primeiravés mai hatan iha tribunál, arrepende nia hahalok no promete sei la komete tan hahalok hanesan iha futuro.

Entretantu lezada kontinua konfirma faktu sira hotu iha akuzasaun no deklara katak sente moe no tauk baihira haree arguidu.

Testemuña TdS nu'udar lezada ninia inan depoimenta katak iha akontesimentu iha 29 Janeiro 2021, iha tuku 17:00 lokraik, testemuña toba hela iha uma laran, lezada tama ba uma laran fanu testemuña no hatete ba testemuña katak “*apa metan doko nia orgaun seksuál no hatudu mai hau*”, hafoin ida ne'e lezada fila ba fase bikan testemuña tuir lezada tama ba iha sira nia haris fatin depois hafuhu arguidu doko hela ninia orgaun seksuál, depoisde ida ne'e testemuña hakilar halai sai no bolu kedan arguidu ninia feen no arguidu ninia feen mai hirus arguidu.

Testemuña depoimenta tan katak depoisde akontesimentu ne'e família rua tuur hamutuk atu rejolve tuir lisan Suai nian, maibé arguidu ninia feen ba haksasuk malu fali ho testemuña tanba ne'e testamuña lori prosesu ne'e ba oin no la konsegue rejolve tuir família.

Alegasaun finál

Prokuradór haktuir katak arguidu konfesa parcialmente maibé lezada konfirma faktu hotu iha akuzasaun no reforsa husi testemuña, prokuradór haree katak arguidu ninia hahalok ne'e prenze duni elementu subjektivu no objektivu ba iha krime ne'e rasik, tanba ne'e husu ba tribunál atu kondena arguidu ba krime koasaun seksuál ho pena prizaun tinan ida fulan neen no ba krime ezibionizmu seksuál kondena arguidu ho pena prizaun tinan ida, nune'e ba krime rua ne'e husu ba tribunál atu kondena arguidu ho pena unika tinan tolu prizaun.

Entretantu defeza husu ba tribunál atu konsidera sirkunstansia sira hanesan arguidu foin primeiravés mai hatan iha tribunál, arrepende nia hahalok no promete sei la komete tan krime hanesan iha futuro, ho razaun hirak ne'e husu ba tribunál atu aplika pena ne'ebé adekuadu ba arguidu.

Desizaun

Depoisde avalia faktu hotu, tribunál prova katak faktu hotu iha akuzasaun ne'e provadu hotu, mezmu arguidu konfesa parsialmente maibé lezada konfirma akuzasaun no reforsa mós husi testemuña.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu arrepende nia hahalok, foin primeiravés mai hatan iha tribunál no promete sei la komete tan krime hanesan iha futuro, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida no selu mós kustu judicial US\$50.00.

9. Krime ofensa ba integridade fízika agravadu

Nú prosesu	: 0034/19.CVSL
Kompozisaun Tribunál	: Koletivu
Juis	: Dr. Samuel da Costa Pacheco, Dr. Eusébio Xavier Victor no Dra. Patricia de Araujo F. B. M. Xavier
Prokuradór	: Dr. Napoleão Soares da Silva
Defeza	: Dr. Fransisco Caitano Martins
Desizaun	: Pena prizaun tinan 3 suspende ba tinan 4 no indemnizasaun sivíl US\$250.00 ba kada arguidu

Iha 26 Outubru 2021, Tribunál Distritál Suai prezide julgamentu leitura akordaun ba krime ofensa ba integridade fízika agravadu ne'ebé envolve arguidu, Carlos do Rego, Moises do Carmo, Agostinho Gomes no Almerio Amaral hasoru lezadu Martinho Ferreira Vicente, iha Munisípiu Covalima.

Akuzasaun prokuradór

Prokuradór akuza katak iha 26 Novemmburu 2019, iha oras tuku 19:00 kalan, arguidu Agostinho Gomes baku lezadu nia alin naran Alvaro Kehi, hafoin ne'e Alvaro Kehi ba informa ba lezadu katak arguidu Agostinho Gomes baku nia. Ho nune'e lezadu bolu ninia tiu Agostinho do Carmo ba husu tuir arguidu Agostinho Gomes nia uma. Bainhira lezadu ho nia tiu to'o iha arguidu nia uma no husu tuir arguidu katak "*tanba sa mak baku Alvaro Kehi*", arguidu la hatan no direktamente tebe dala ida iha lezadu nia tiu Agostinho do Carmo nia kabun no lezadu Martinho Ferreira Vicente ba hafahe tiha sira maibe derepente de'it, arguidu sira Carlos do Rego, Moises do Carmo, Agostinho Gomes no Almerio Amaral baku lisuk lezadu Martinho Ferreira Vicente ho maneira arguidu Moises do Carmo kaer lezadu nia liman tula ba kotuk depois hakuak metin lezadu no arguidu sira Carlos do Rego, Agostinho Gomes no Almerio Amaral tuku dala barak iha lezadu nia kabun to'o lezadu dezmaia iha fatin. Tuir mai testemuña João do Carmo ajuda lezadu lori lezadu ba ninia uma. Bainhira to'o lezadu nia uma, lezadu sente nia kabun kidun, hirus matan no susun rua moras maka'as, tanba ne'e lezadu nia alin buka kareta no lori lezadu ba iha Ospital Referal Suai no baixa durante loron ualu, lezadu hetan operasaun husi mediku sira tanba lezadu nia teen-oan no teen-boot nakles. Aktu sira ne'e rezulta lezadu labele kaer ona serbisu hanesan baibain.

Prokuradór akuza arguidu sira kontra artigu 146 KP kona-ba ofensa ba integridade fizika grave ho moldura penal tinan 2 to'o tinan 8 prizaun.

Produsaun ba prova sira

Iha julgamentu, arguidu nain tolu Carlos do Rego, Almerio Amaral no Moises do Carmo nega faktu hotu iha akuzasaun no deklarata katak iha akontesimentu ne'e arguidu sira la iha fatin akontesimentu. Enkuantu arguidu Agostinho Gomes konfesa katak tebe dala ida iha Sr. Agostinho do Carmo nia kabun, maibe ba lezadu Martinho arguidu rezeita katak la halo agreasaun hirak ne'e hasoru lezadu.

Entretantu lezadu deklarata katak iha akontesimentu ne'e arguidu Agostinho do Carmo baku lezadu nia alin Alvaro Kehi nune'e lezadu ho nia tiu ba arguidu nia uma husu tuir de'it arguidu maibe arguidu direita tebe kedan lezadu nia tiu nia kabun, lezadu deklarata tan katak arguidu moises mak hakuak metin lezadu depois arguidu Almerio mak tuku lezadu nia kabun, arguidu nain rua seluk Carlos do Rego no Agostinho Gomes lezadu la haree sira nain rua baku lezadu. Lezadu deklarata liutan katak durante loron ualu baixa iha ospital no nia operasaun ne'e suku pontu sanulu resin ualu no agora dadaun la kaer ona serbisu hanesan uluk.

Testemuña João do Carmo, nu'udar lezadu nia primu depoimenta katak iha akontesimentu ne'e testemuña mos ba hotu fatin akontesimentu atu husu tuir arguidu agostinho maibe arguidu Agostinho tebe kedan dala ida iha testemuña nia aman Agostinho do Carmo nia kabun, testemuña depoimenta tan katak arguidu moises mak hakuak lezadu no arguidu Almerio Amaral mak tuku iha lezadu nia kabun.

Alegasaun final

Prokuradór haktuir katak arguidu sira komete duni krime krime ne'e hasoru lezadu no bazeia ba deklarasaun lezadu nian katak lezadu agora dadaun la kaer ona serbisu

tanba arguidu sira nia hahalok. Prokuradór entende katak arguidu sira ninia hahalok ne'e priense duni krime sira iha artigu 146 KP. Tanba ne'e husu ba tribunál atu kondena arguidu sira ho pena prizaun tinan tolu suspende ba iha tinan haat.

Entretantu defeza haktuir katak iha julgamentu arguidu Moises no Almerio konfesa katak sira rua ida hakuak no ida mak tebe, maibé ba arguidu seluk iha perante julgamentu arguidu sira deklara katak depoisde akontesimentu hotu mak sira ba iha fatin akontesimentu, nune'e mós lezadu haktuir katak loos duni momentu la haree arguidu sira seluk. Defeza bazeia ba arguidu ninia prejensa iha julgamentu no tuir informasaun lezadu agora dadaun ne'e ba halo toos no halo natar, tanba ne'e defeza husu ba tribunál atu altera tiha krime ofensa integridade fizika grave ba fali ofensa integridade fizika simples, nune'e husu ba tribunál nofika fali lezadu halo tentativa konsiliausaun

Bazeia ba defeza ninia pedidu alterasaun ne'e prokuradór maintéin ho ninia akuzasaun, alende ne'e tribunál deklara katak halo deliberasaun mak apresia de'it.

Desizaun

Depoisde avalia faktu hotu tribunál prova katak arguidu Agostinho Gomes baku lezadu nia alin naran Alvaro Kehi, hafoin ne'e Alvaro Kehi ba informa ba lezadu katak arguidu Agostinho Gomes baku nia. Ho nune'e lezadu bolu ninia tiu Agostinho do Carmo ba husu tuir arguidu Agostinho Gomes nia uma. Bainhira lezadu ho nia tiu to'o iha arguidu nia uma no husu tuir arguidu katak *"tanba sa mak baku Alvaro Kehi"*, arguidu la hatan no diretamente tebe dala ida iha lezadu nia tiu Agostinho do Carmo nia kabun no lezadu Martinho Ferreira Vicente ba hafahe tiha sira maibé derepente de'it, arguidu sira Carlos do Rego, Moises do Carmo, Agostinho Gomes no Almerio Amaral baku lisuk lezadu Martinho Ferreira Vicente ho maneira arguidu Moises do Carmo kaer lezadu nia liman tula ba kotuk depois hakuak metin lezadu no arguidu sira Carlos do Rego, Agostinho Gomes no Almerio Amaral tuku dala barak iha lezadu nia kabun to'o lezadu dezmaia iha fatin. Tuir mai testemuña João do Carmo ajuda lezadu lori lezadu ba ninia uma. Bainhira to'o lezadu nia uma, lezadu sente nia kabun kidun, hirus matan no susun rua moras maka'as, tanba ne'e lezadu nia alin buka kareta no lori lezadu ba iha Ospital Referál Suai no baixa durante loron ualu, lezadu hetan operasaun husi médiku sira tanba lezadu nia teen-oan no teen-boot nakles.

Bazeia ba faktu provadu sira ne'e no tetu mós ho sirkunstánsia atenuante sira ne'e hotu, tribunál konklui prosesu ne'e no kondena arguidu ho pena prizaun tinan tolu suspende ba tinan haat no selu mós kustu judisial kada arguidu US\$20.00 no kondena arguidu kada ema ida selu indemnizasaun ho valor US\$250.00 ba lezadu.

10. Krime tentativa koasaun seksuál

Nú Prosesu	: 0055/19. CVSUI
Kompozisaun Tribunál	: Singulár
Juis	: Dr. Naason Mário Armindo Marques Doutel, Dr. Benjamin Barros no Dr. Jose Maria Araújo
Prokuradór	: Dr. Rafael Jeronimo Gusmão

Defeza : Dr. Albino de Jesus Pereira
Desizaun : Absolve

Iha 27 Outubru 2021, Tribunál Distritál Suai prezide julgamentu leitura akordaun ba krime tentantiva koasaun seksuál ne'ebé envolve arguidu OJA hasoru lezada GMU, iha Munisípiu Covalima.

Akuzasaun prokuradór

Prokuradór akuza katak iha 24 Outubru 2019, oras tuku 16:00 lokraik, lezada toba dukur hela iha ninia kuartu laran, derepente arguidu tama ba lezada nia kuartu foti manta taka ba lezada nia ulun, hafoin ne'e lezada loke tiha manta ne'e no haree arguidu, maibé arguidu kontinua rasta lezada nia faru besik hirus matan, nune'e lezada tauk no hakilar nune'e arguidu mós tauk no halai sai ba iha liur, bainhira arguidu halai sai ba iha liur lezada nia alin mane mós haree arguidu. Tuir mai lezada ho nia maun tuir arguidu ba iha ninia uma no husu arguidu maibé arguidu nega ba ninia hahalok sira.

Prokuradór akuza arguidu kontra artigu 23, 24 KP no artigu 171 KP kona-ba tentativa koasaun seksuál ho moldura penál tinan 2 to'o tinan 8 prizaun.

Produsaun ba prova sira

Iha prosesu julgamentu arguidu deklara katak faktu sira ne'e la loos hotu, arguidu deklara katak iha akontesimentu ne'e iha tuku 8:00 dadeer, ba kua tua iha toos laran tuir mai iha oras tuku 13:00 meudia, arguidu ho nia mane foun ba iha toos laran kuu aifarina tahan depois fila ba ninia uma, bainhira arguidu to'o iha uma lezada tanis hela nune'e arguidu husu lezada, maibé lezada hatan katak "*katuas ó kaer hau nia hirus matan*", arguidu reponde katak labarik hau foin fila husi to'os "*ó haree kalae mak ó dun hau kaer ó nia hirus matan*", depoisde ida ne'e lezada fila ba ninia uma no deklara tan katak foin primeravés mai hatan iha tribunál.

Alende ne'e lezada kontinua konfirma faktu sira hotu iha akuzasaun no deklara katak kuñese arguidu tanba uma besik malu, lezada deklara katak depoisde ida ne'e lezada ho nia maun tuir arguidu ba iha to'os laran maibé arguidu nega katak lahalo. Lezada haktuir liután katak depoisde akontesimentu ne'e problema ne'e seidauk rejolve. Lezada deklara tan katak momentu arguidu tama ba kuartu ne'e hatais faru mutin.

Testemuña AG hanesan lezada nia alin depoimenta katak momentu akontesimentu ne'e nonton hela telvizaun iha sala vizita nian, derepente lezada hakilar no arguidu halai sai husi kuartu ba iha liur testemuña hateke tuir no hetan arguidu OJA, testemuña haktuir katak arguidu momentu halai sai ba ne'e testemuña haree arguidu hatais faru matak.

Alegasaun finál

Prokuradór haktuir katak mezmú arguidu nega faktu hotu iha akuzasaun, maibé lezada kontinua konfirma faktu hotu iha akuzasaun no reforsa husi testemuña. Prokuradór entende katak arguidu ninia hahalok ne'e preense duni elementu sira husi iha krime koasaun seksuál, tanba ne'e husu ba tribunál atu kondena arguidu tuir artigu 171 KP.

Entertantu defeza haktuir katak iha perente julgamentu arguidu nia deklarasaun katak nia lahalo buat ida hasoru lezada, maibé bainhira rona lezada katak momentu arguidu tama ba lezada nia kuartu laran ne'e hatais faru mutin, enkuantu rona fali testamuña nia deklarasaun katak arguidu hatais faru matak, defeza entende katak dala ruma lezada mehi kona arguidu kaer lezada nia faru. parte seluk defeza entende katak krime ne'e rasik la priense elemetu sira iha artigu 171 KP, tuir lezada nia deklarasaun katak arguidu kaer de'it lezada nia faru maibé arguidu ninia liman la kona iha lezada nia hirus matan, ho razaun sira ne'e husu ba tribunál absolve arguidu husi krime ne'e.

Desizaun

Depoisde avalia faktu hotu tribunál prova katak lezada toba dukur hela iha ninia kuartu laran, derepente arguidu tama ba lezada nia kuartu foti manta taka ba lezada nia ulun, hafoin ne'e lezada loke tiha manta ne'e no haree arguidu, maibé arguidu kontinua rasta lezada nia faru besik hirus matan, nune'e lezada tauk no hakilar nune'e arguidu mós tauk no halai sai ba iha liur, bainhira arguidu halai sai ba iha liur lezada nia alin mane mós haree arguidu. Tuir mai lezada ho nia maun tuir arguidu ba iha ninia uma no husu arguidu maibé arguidu nega ba ninia hahalok sira.

Tribunál konsidera akuzasaun prokuradór nian ne'e la provadu, tanba iha julgamentu lezada deklarata katak bainhira arguidu tama ba iha lezada nia kuartu laran ne'e, arguidu hatais faru mutin, maibé rona fali testemuña katak arguidu halai sai husi uma ne'e arguidu hatais faru matak, tribunál duvida ho deklarasaun sira ne'ebé prodús iha julgamentu nune'e tribunál absolve arguidu husi krime ne'e.

11. Krime ofensa ba integridade fizika simples ho natureza violénsia doméstika

Nú. Prosesu	: 0039/17 CVSUI
Kompozisaun Tribunál	: Singulár
Juis	: Dr. Samuel d. Costa. Pacheco
Prokuradór	: Dr. Rafael Jeronimo Gusmão
Defeza	: Dr. Angelmo Pinto
Desizaun	: Pena prizaun fulan 3 suspende ba tinan 1

Iha 28 Outubru 2021, Tribunál Distritál Suai prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu SSR hasoru nia feen, iha Munisípiu Covalima.

Akuzasaun prokuradór

Prokuradór akuza katak iha 18 Maiu 2017, iha oras tuku 12:00 meiodia, lezada ho arguidu iha uma, lezada bolu nia alin mane JAdJ katak *“apa bolu tanba rai kalan ona”*, arguidu rona ida ne'e nervozu kaer no rasta lezada ba iha to'os laran, hodi tuku dala ida iha lezada nia reen-toos parte karuk rezulta moras no bubu, depoisde lori fali lezada ba uma no arguidu kalan ne'e kedan ba toba iha nia alin nia uma no iha dadeer, lezada ba fanu arguidu maibé arguidu hadeer, basa tan dala ida iha lezada nia hasan parte loos no lezada monu no desmaia tiha no arguidu halai fila ba ninia rai. Desde arguidu moris

hamtuk ho lezada nu'udar feen laen, arguidu sempre baku hela de'it lezada bainhira lezada nia inan aman la iha uma.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penal tinan 3 ka multa konjuga ho artigu 2,3 (a) , 35 (b) no 36 LKVD.

Produsaun ba prova sira

Iha julgamentu arguidu deklara katak faktu balun loos no balun la loos, arguidu deklara katak iha akontesimentu ne'e tuku dala ida iha lezada nia reen-toos parte karuk no basa dala ida iha lezada nia hasan parte loos, maibé kona-ba antes ne'e arguidu baku bebeik lezada ne'e laloos. Arguidu deklara liután katak areepende nia hahalok, foin primeiravés mai hatan iha tribunál no promete sei la repete ninia hahalok ne'e iha futuru no agora dadaun moris separadu ona ho lezada.

Iha parte seluk lezada kontinua konfirma faktu sira iha akuzasaun no deklara katak kona-ba akontesimentu sira uluk ne'e lezada haluha tiha ona loron, fulan no tinan no lezada haktuir liután katak agora dadaun arguidu moris separadu ona.

Alegasaun finál

Prokuradór haktuir katak arguidu komete krime ofensa ba integridade fizika simples ho forma violénsia doméstika, prokuradór haree katak kazu violénsia doméstika ass tebes tanba ne'e atu prevene arguidu la repete ninia hahalok ne'e iha futuru husu ba tribunál atu kondena arguidu ho pena prizaun tinan ida suspende ba tinan ida.

Entretantu defeza haktuir katak arguidu foin primeravés mai hatan iha tribunál, arrepende nia hahalok no promete sei larepete nia hahalok ne'e iha futuru tanba ne'e husu ba tribunál aplika pena ne'ebé justu liu mak pena multa.

Desizaun

Depoisde avalia faktu hotu, tribunál prova katak tuku dala ida iha lezada nia reen-toos parte karuk rezulta moras no bubu, depoisde lori fali lezada ba uma no arguidu kalan ne'e kedan ba toba iha nia alin nia uma no iha dadeer, lezada ba fanu arguidu maibé arguidu hadeer, basa tan dala ida iha lezada nia hasan parte loos no lezada monu no desmaia tiha no arguidu halai fila ba ninia rai. Desde arguidu moris hamtuk ho lezada nu'udar feen laen, arguidu sempre baku hela de'it lezada bainhira lezada nia inan aman la iha uma.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu foin primeiravés mai hatan iha tribunál, arrepende nia hahalok no promete sei la repete tan hahalok hanesan iha futuru, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

12. Krime ofensa ba integridade fizika simples ho natureza violénsia doméstika

Nú. Prosesu : 0002/21. CVSLL
Kompozisaun Tribunál : Singulár

Juis : Dr. Samuel da Costa Pacheco
Prokuradór : Dr. Rafael Jeronimo Gusmão
Defeza : Dr. Albino de Jesus Pereira
Desizaun : Pena prizaun fulan neen suspende ba tinan ida.

Iha 28 Outubru 2021, Tribunál Distritál Suai prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu AM hasoru nia feen, iha Munisipiu Covalima.

Akuzasaun prokuradór

Prokuradór akuza katak iha 24 Dezembru 2020, iha oras tuku 11:00 dadeer, arguidu tuku dala rua iha lezada nia kanuruk, foti ai-pedasuk baku dala ida iha lezada nia ulun parte karuk, tebe dala ida iha lezada nia liman sikun no tebe dala ida iha lezada nia knosen halo lezada monu ba rai no lezada ba halo tratamentu iha PRADET. Antes agresaun ne'e, arguidu ho lezada diskute malu, bainhira sira nia oan nia tinan haruka arguidu ho lezada kaer bee iha kopu maibé arguidu lakohi no komete aktu hirak ne'e hasoru lezada.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu arguidu konfesa integralmente faktu hotu iha akuzasaun, no deklarasaun katak arrepende ninia hahalok, di'ak malu ona ho lezada, foin primeiravéz komete krime no mai hatan iha tribunál no promete sei larepete ninia hahalok ne'e hasoru lezada no ema seluk.

Alende ne'e lezada kontinua konfirma faktu hotu iha akuzasaun no konfirma mós ho arguidu nia deklarasaun katak arguidu foin primeiravéz komete krime hasoru lezada.

Tamba arguidu konfesa faktu hotu nune'e presinde testemuña.

Alegasaun finál

Prokuradór haktuir katak arguidu provadu komete krime hasoru lezada bazeia ba deklarasaun arguidu nian no konfirma mós husi lezada, tanba ne'e atu prevene arguidu repete tan nia hahalok ne'e iha futuru husu ba tribunál atu kondena arguidu ho pena prizaun fulan neen suspende ba tinan ida.

Entretantu defeza husu ba tribunál atu kondena arguidu ho pena ne'ebé kmaan, tanba arguidu konfesa, arrepende nia hahalok, foin primeravéz komete krime no mai hatan iha tribunál no promete sei la komete tan hahalok hanesan hasoru lezada no ema seluk.

Desizaun

Depoisde avalia faktu hotu, tribunál prova katak arguidu tuku dala rua iha lezada nia kanuruk, foti ai-pedasuk baku dala ida iha lezada nia ulun parte karuk, tebe dala ida iha lezada nia liman sikun no tebe dala ida iha lezada nia knosen halo lezada monu ba rai.

Bazeia ba faktu provadu sira ne'e no tetu mós ho sirkunstánsia atenuante sira hanesan, arguidu konfesa, arrepende nia hahalok, di'ak malu ona ho lezada, foin primeravés komete krime no mai hatan iha tribunál no promete sei la komete tan krime hanesan hasoru lezada no ema seluk, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

13. Krime ofensa ba integridade fizika simples ho natureza violénsia doméstika

Nú. Prosesu : 0055/20.CVSUI
Kompozisaun Tribunál : Singulár
Juis : Dr. Naason Mário Armindo Marques Doutel
Prokuradór : Dr. Rafael Jeronimo Gusmão
Defeza : Dr. Albino de Jesus Pereira
Desizaun : Pena prizaun fulan tolu suspende ba tinan ida

Iha 28 Outubru 2021, Tribunál Distritál Suai prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu NB hasoru nia feen, iha Munisípiu Covalima.

Akuzasaun prokuradór

Prokuradór akuza katak iha 23 Jullu 2019, iha oras tuku 12:00 meiodia, arguidu lori kapasete baku dala ida iha lezada nia liman parte karuk no tebe dala ida iha lezada nia kanotak parte karuk. Antes agresaun ne'e, arguidu ho lezada diskute malu kona-ba, iha nomor foun mak telefone arguidu no lezada mak foti telefone no fetu mak ko'alia, nune'e mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu arguidu konfesa faktu hotu iha akuzasaun, arguidu mós deklara katak arrepende ninia hahalok, foin primeiravéz mai hatan iha tribunál no promete sei la komete tan krime hanesan hasoru lezada no ema seluk iha futuru no di'ak malu ona ho lezada.

Alende ne'e lezada kontinua konfirma faktu hotu iha akuzasaun no deklara mós katak di'ak malu ona ho arguidu.

Alegasaun finál

Prokuradór haktuir katak arguidu provadu komete krime hirak ne'e hasoru lezada no krime violénsia doméstika aas tebes, tanba ne'e husu ba tribunál atu kondena arguidu ho pena prizaun tinan ida suspende ba tinan ida.

Entretantu defeza husu ba tribunál atu kondena arguidu ho pena ne'ebé kmaan ho konsiderasaun katak arguidu konfesa, arrepende nia hahalok, di'ak malu ona ho lezada no foin primeiravés mai hatan iha tribunál.

Desizaun

Depoisde avalia faktu hotu, tribunál prova katak arguidu lori kapasete baku dala ida iha lezada nia liman parte karuk no tebe dala ida iha lezada nia kanotak parte karuk.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, arrepende nia hahalok, di'ak malu ona ho lezada no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Telefone: 3323883/77040735
Diresaun e-mail: ana@jsmp.tl
info@jsmp.tl
Website: <http://jsmp.tl>